

Dut l bon, 15 ani "Cunsëi de Furmazion"

Ai 23 de setëmber iel uni festejâ i Cunsëis de Furmazion te nosta provinzia y per chësta rejon iel unî metù a jì n di apostâ dedicâ propi a chisc cunsëies.

Cun la lege n. 41 dl 1983 ova l guviern provinziel fat ora che ti chemuns possel unî metù su n cunsëi de furmazion. Chësc ie na sort de lia têt per duta la lies de n luech che à l fin de purtè inant la furmazion permanènta, chël uel di, cuordinea l'ativiteies de furmazion y mèt a jì d'unî sort de manifestazions y scumenciadives de chësta sort. Fè pea pra n tel cunsëi fej persones nteressedes ala cultura y furmazion, ma nce rapresentanc de chemun, dla scola y dla biblioteches. Te Südtirol iel nuceicundì bèn 136 cunsëies de furmazion.

Te nosc luech àn sambèn ènghe ulú fé festa; l ie 15 ani ncà da canche l fova unî dat vita al Cunsëi de Furmazion de Sëlva (ntlèuta fova David Lardschneider assessëur ala cultura). Ntan chisc ani iel unî fat na gran atività; truepes ie la manifestazion y dantaldut i proiec che ie unic realisei - for n cunlaurazion cun la lies dl luech y dla valeda. Nscila se àn an-

cuntà dan l'Istitut Ladin, n sada danmesdi. L dut. Rudolf Mussner, nstës ex-president de chësc cunsëi, à dat na udleda sintetica ala cronostoria dl "cunsëi" auzan ora la manifestazions plu mpurtantes. Nce tl ciamp dl editoria se an dat da fé; l liber "Nosta Sëlva" ie l frut de n gran lèur de nrescida y che ie na publicazion de gran valuta per duta la cumenanza. N lèur mpurtant che n fej al mumënt ie chëla dla digitalisazion y archivisazion dla vedla fotografies de Sëlva. Ultimamënter à l chemun de Sëlva metù a disposizion n local te cësa de cultura ulache n possa mèter via fotografies y documënc da zacan a na maniera che i ebe n post segur. La parola à nce têt l president da sën, dut. Lukas Plancker y l ambolt Roland Demetz. Wilma Donà Linder che ie stata per truep ani presidenta de chësta lia, à lecurdà che tl prim fovel rie a ti stlari ala lies la funzion y la mpurtanta de n cunsëi de furmazion, ma che man man iesen stac boni de abiné na bona cunlaurazion cun la lies dl luech.

Per ti dé mo plu mpurtanza a chësc anuel di 15 ani iel



Pra la festa alalergia dan l Istitut Ladin



Wilma Donà Linder, per truep ani - dal 2002 al 2014 - presidenta, dl Cunsëi de Furmazion de Sëlva.



Canche l ie festa iel daniëura nce mujga: Jonas, Luca y Manuel à sunà teles da druck sun la "Steirische".

unî fat n valgun "totems" ulache n pudova liejer do l'atività y ti cialé a n valguna fotografies.

Film "Viver te Sëlva"

Oradechël iel unî realisà n film ulache zitadins, granc

y pitli, à dit si minonga y si mprescion (nce critiches) sun l luech de Sëlva. Nteressei possa jì a ti cialé al film sun internet, plu avisa sun www.youtube.com dajan ite la paroles *viver te sëlva*.



Rapresentanc dl Cunsëi de Furmazion de Sëlva; da man ciancia: Petra Senoner (scoles), Christine Senoner (rapr. dl Chemun), Lukas Plancker (president), Marta Senoner (rapr. dla lies), Tullio Mussner (cassier) y Marion Perathoner (cunlauradëura).

Proiec dl Cunsëi de Furmazion de Sëlva ti ultimi 15 ani

- 2004 L'educazion tres l sport
- 2005 Chi sons'a? Uniun ie na personalità te si pitl mond
- 2006 Vita da unidl - Viver o sperimenté la vita di per di
- 2007 Enes sun la sanità (livel de valeda)
- 2008 Mostra de vedla fotografies: „La jënt y si vita“
- 2009 Viac tres nosta storia
- 2010 Solidarietà y curaje zevil
- 2011 Sëurantò respunsablità
- 2012 Nosta storia - nosta stories
- 2013 Mostra de fotografies: „La troht, l quant da Sandl“
- 2014 Jënt jëuna anconta jënt de tēp
- 2015 Gherdëina y la Gran Viera (livel de valeda)
- 2016 Connect - Jëuni y tecnologia
- 2017 Viver la montes

- 2012 Cronica „Nosta Sëlva“
- 2013 Digitalisazion de vedla fotografies (www.selvafoto.it)
- 2016 Plata Facebook: facebook.com/furmazionselva/